

**ALAC PRIČA:
GRAĐANKA SARAJEVA**



TI BIH je zaprimio anonimni e mail putem Centra za pružanje pravne pomoći u borbi protiv korupcije od ženske osobe koja je zaposlena u Ministarstvu unutrašnjih poslova Kantona Sarajevo (MUP KS), a koja je željela da ostane anonimna te se predstavila kao „Građanka Sarajeva“.

Ta osoba nas je obavijestila da je kao zaposlenica u MUP KS došla do podatka da je određena ženska osoba prijavila Ministru MUP-a KS saobraćajnog policajca koji ju je zaustavio te prilikom rutinske saobraćajne kontrole vozila verbalno zlostavljao sa seksualnim prizvukom.

Ministar u MUP KS, je po navodima Građanke Sarajeva, umjesto da po službenoj dužnosti provjeri navode vezane za saobraćajnog policajca, izdao depešu (interni akt naredbodavnog karaktera) svim policijskim upravama u kantonu Sarajevo u kojoj je opisao vozilo, sa registarskim tablicama, te ime i prezime prijaviteljice saobraćajnog policajca, te u depeši naredio da saobraćajni policajci zaustavljaju vozilo prijaviteljice, te da istoj „nalaze“ saobraćajne prestupe i što više je kažnjavaju.

Obzirom da su u ovom e mailu navedene vrlo ozbiljne optužbe, TI BIH je za početak posavjetovao Građanku Sarajeva da svoja saznanja anonimno prosljedi Uredu za pritužbe javnosti MUP-u KS, što je stranka i uradila, ali nije dobila nikakav odgovor. TI BIH je povodom toga uputio dopis MUP KS s molbom da nas obavijeste da li su preduzimali aktivnosti povodom anonimne prijave. Iz MUP-a smo dobili obavijest da je Ured za pritužbe javnosti MUP-a sproveo postupak ispitivanja navoda iz anonimne prijave te da je donio Zaključak da nema osnova za provođenje unutrašnje istrage.

TI BIH se u cilju provjere sprovedenih aktivnosti od strane MUP-a KS, sa pozivom na Zakon o slobodi pristupa informacijama obratio MUP-u i tražio dostavu pomenutih Zaključaka. MUP Kantona Sarajevo je povodom našeg zahtjeva donio Rješenje kojim odbija pristup traženim informacijama.

Kao razlog odbijanja dostave informacije, službenik za pristup informacijama naveo je da se tražena informacija smatra izuzetkom u smislu Zakona o slobodi pristupa informacijama. TI BIH je blagovremeno uputio žalbu Federalnom ministarstvu pravde kao drugostepenom organu, ukazujući na činjenicu da je informacija proglašena izuzetkom ali bez sprovođenja testa javnog interesa.

Federalno ministarstvo pravde je usvojilo žalbu TI BiH-a i predmet vratilo prvostepenom organu na ponovno odlučivanje. MUP Kantona Sarajevo je u ponovnom postupku donio Rješenje kojim odbija pristup informacijama, na šta je TI BiH ponovo uložio žalbu, koja je takođe usvojena, rješenje MUP KS poništeno i predmet vraćen MUP KS na ponovno odlučivanje.

U ponovnom postupku, MUP KS je ponovo donio Rješenje kojim odbija dostavu informacija uz napomenu da se shvatanje MUP-a KS neće promijeniti uprkos konstantnom usvajanju žalbi TI BiH-a od strane drugostepenog organa. TI BiH je uložio žalbu na ovo rješenje i predložio drugostepenom organu da iskoristi svoja ovlaštenja i naloži MUP KS dostavu informacija. Dana 22.04.2011.g. Federalno ministarstvo pravde je usvojilo žalbu TI BiH- a i u prilogu dostavilo traženu informaciju koja je „oduzeta“ od MUP KS.

Slučaj Građanka Sarajeva je jedan od hiljadu slučajeva koji se procesuiraju putem projekta ALAC – Advocacy and Legal Advice Center, Transparency International BiH.

Nakon konačnog prijema tražene informacije, TI BiH je ustanovio da Ured za pritužbe javnosti MUP KS nije sproveo disciplinski postupak u skladu sa Zakonom o policijskim službenicima i Pravilnikom o disciplinskoj odgovornosti, te da čak nije ni donešen Zaključak o nesprovođenju unutrašnje istrage, nego je samo zapisnički konstatovano da se istraga neće sprovoditi, te je iz tog razloga razumljivo konstantno odbijanje dostave informacija od strane MUP-a KS.

Obzirom da je od zaprimanja anonimne prijave do odobravanja pristupa informacijama proteklo gotovo godinu dana TI BiH planira u narednom periodu da obavjesti javnost putem medija o ovom predmetu o površnom radu – Ured za pritužbe javnosti, kao i da nastavi institucionalnu borbu za dosljednu primjenu zakona od strane javnih organa

